

İNSONI HƏXON BARƏDƏ UMUMİYƏ BƏYONNOMƏ

Preambula

Bə insoni avlodon həmməy xasbiə ləyoğətə fikfamon iyən çəvon bərobərbiə, yəndiku conibə həxon zinə - ozodəti, ədoləti iyən sulhbeyəti əsosinə şərtbe bə nəzə seədə;

Bə insoni həxon beitonəti iyən nifrət kardeəti bəşəriyyəti bə dəhşətvardə barbarizmi səbəb be, həmçinin bə sıxankarde, etiqadbaste ozodəti malikbiə, tarsiku, ehtijociku ozodbə dinyo ofəyemonəti çı bəşəriyyəti ən ali piyəybe bə nəzə seədə;

İnsani bə zılni-istibdodi vəynə bənə oxonə vasitə bə gıyom eşte məcbur nibe təmin kayro insoni həxon de ghanuni hukuməti dasti mıdafiə karde zəruribe bə nəzə seədə;

Xəlğon arədə mehribanə munasibəton oko dastək doy vacibəti bə nəzə seədə;

İbiə Milləton xalqon İbiə Milləton Təşkilati (İMT) Nizomnomədə bə əsosinə insoni həxon, bə insoni şəxsiyyəti ləyoğəti iyən gıyməti, merdon-jenon həxon bərobəratə bovə kay təsdiğ karde, həmçinin həniyəon hevujə ozodəti şəraitədə bə sosialə tərəğği nailbe iyən bo jimoni şəraitəi çokbeyo koməq karde bə qətm doə be bə nəzə seədə;

Uzvbə devləton de İMT həmkəti şəraitədə bə insoni həxon iyən əsosinə ozodətiyon bəməl vardero koməqəti karde bəştə ehdə peqəteəti bə nəzə seədə;

İn həxon iyən ozodətiyon tam dərk kardeyo həmonə ehdəpeqətəyon bə vırə rosniye yolə əhəmiyyət kəsb kardeəti bə nəzə seədəy;

İMT Penə Məclis

bəyon kardedə İnsani Həxon barədə Umumiyyə Bəyonnomə qələy vəzifə təkə, əçəyon bə vırə rəse qorə bəpe həmmə milləton iyən dəvləton joğə cəhd bıkən ki, har kəs iyən cəmiyyəti har qılə orqan in Bəyonnomə iştə dastədə rəhbər qəte əsosdə maarifvonəti ya de tədrisə roy bə in həxon iyən ozodətiyon hurmətkarde iyən əvoni təmin kayro dastək be bızno, milli iyən beynəlxalqə səviyyəde de tərəqqipərvərə tədbiron roy həm İMT uzvbə xəlğon, həməon çəvon yuristiksiyə jiyobə əraziyonədə jiyə xəlğon arədə həmməyəvo iyən effektiv zinə bibu.

Maddə 1

Həmmə insonon bəştə ləyoğəti iyən həxonro ozod iyən bərobər movardə bedən. Çəvon suur iyən vicdon hese, əve ki, deyəndi mınasibətədə bənə bıvə rəftor kardəninin.

Maddə 2

Har qılə şəxs iştə irqi, pusti ranqi, cinsi, zıvoni, dini iyən co əğidə, milli ya sosial səvoni, əmlakə, sosialə movqə iyən co vəziyyətikü bəşikrə nıbə in Bəyonnomədə elon kardə biə həmmə həxon iyən ozodətiyon malik bənine.

Çımiku ziodə, çı həminə şəxsi mənsubbə məmləkəti ya ərazi, çı ərazi mıtəğiləti, gəyyuməti jiyobe, iştənidarənibə be ya suverenəti har curə şiklədə məhdud beku bəşikrə nıbə, siyasiyə, huğugiyə iyən beynəlxalğə statusiku bə nav omə co-səçinətiyon barde əbini.

Maddə 3

Har şəxsi bo jiye, bo ozodəti iyən şəxsi dastnıjənəti həxiş hese.

Maddə 4

Hiç kəs bənə kolə (nokə) ya şıkrə vəziyyətədə oğate əbini; ğuldorəti iyən ğulə hiriyemon həmməy formondə ğədəğən kardə bedə.

Maddə 5

Hiç kəs bə əzobi, ya ğəddorə, çəy ləyoğəti bə ji vardə ğeyri-insonə mınəsibəton, bə cəzoon məruz nibənine.

Maddə 6

Har qılə şəxs konco bedə bibu ıştə həxe subyektəti zıneyəti həxiş heste .

Maddə 7

Həmmə insonon ğanuni vədə bərobərin iyən qanuni tərəfikü bərobər şıklədə ıştəni mıdafiə həxjon hestişone. Həmmə insonon ın Bəyonnomə dəcvoniyə har curə co-vijniyətionku, bə jələvonə co-vijniyətion har curə cəhdiku bərobər şıklədə mıdafiə həxjon hestişone.

Maddə 8

Har qılə şəxsi Konstitusiyə ya ğanuni bəy doə həxon dəcvoniyə vaxtədə səlohiyətinə milliyə məhkəmon tərəfikü ıştə həxon mıdafiə karde həxiş heste.

Maddə 9

Hiç kəs ıştənbəsə bə həbs, bo qəte ya bə kuçovnə məruz mande əzini.

Maddə 10

Har qılə şəxsi çəy həx iyən vəzıfon təyin kardeyo iyən bəyo handə bıə cinoyətə ittihomon əsosin be mıyyəyən kardeyo, bəçəy koy mıstəğılə, bitərəfə məhkəmədə tam bərobərəti əsasədə, de oşkoəti iyən çı ədoləti həmməy tələbon çəş karde şəraitədə diyə kay həxiş heste.

Maddə 11

1. Cinayət kardeədə ittihombıə har qılə şəxs tovə çəy qıno bəçəy mıdafiəyo həmmə imkonon təminbıə oje məhkəmə istintağədə de ğanuniyə ro sıbut be, beqıno hisobbe həxiş heste.

2. Hiç qılə şəxs de milliyə ğanundoəti iyən de beynəlxalğə həxon əsosi bino be vaxt cinoyət hisob nibə hərəkət iyən behərəkəton qorə cinoyətədə ittihom be əzini. Həmçinin bəy cinoyəti kardə vaxtədə tətbiğ bey zınə cəzoku qonə cəzo tətbiğ bey əzini.

Maddə 12

Hiç qılə şəxs bə şəxsiyə, xeyzonə mıdaxilə, kə-bə ənəqınıyətı, bəyəndı məktub nıvışte nunəkiliyətı, bəştə şərəfi iyən nufuzı ıştənbəsə ğəsdi məruz be əzını. Har kəsi bə joğo mıdaxilə iyən ğəsdi çı ğanuni tərəfikü mıdafiə bey həxiş heste.

Maddə 13

1. Har qılə şəxsi har qılə məmləkəti hududədə sərbəst hərəkət karde iyən jimonə vırə səçınıye həxiş heste.
2. Har kəsi ıştən olkən daxil be şərti har qılə məmləkət tərək karde iyən bəştə olkə oqarde həxiş heste.

Maddə 14

1. Har qılə şəxsi təqibiku co məmləkətedə boştəno pənəhqə nəve, həmçinin çı pənəhqəədə istifadə karde həxiş heste.
2. Çı həxədə həğigətən bə ğeyri-siyasiyə cinayəton ro doədə, ya bə İMT-i məğsədon iyən prinsipən zidd hərəkətonku bə nav omə təğibən vaxti istifadə karde əbını.

Maddə 15

1. Har qılə şəxsi vətəndoşətı həxiş heste.
2. Hiç kəs ıştənbəsə vətəndoşətiku, iyən vətəndoşətı dəqışkarde həxeku məhrum karde əbını.

Maddə 16

1. Bə perəsemonə sini rəsə merdon iyən jenon irqiyə, milliyə, diniyə əloməton qorə hiç qılə məhdudiyət nıbəy bə nikah daxilbe iyən kəxıvandbe həx hısteşone. Əvon bə nikah daxil beədə, nikahi mıddətədə ya çəy dəcvonə vaxtədə çı eyni həxonku istifodə kardedən.
2. Nikah bə nikahi daxil bıə har dıqlə tərəf ozodə iyən tam rozi beədə dəbastə bedə.
3. Xeyzon çı cəmiyyətı təbiə iyən sərqrupə vahide, çəy çı cəmiyyətı iyən devləti tərəfikü mıdafiəbey həxiş heste.

Maddə 17

1. Har qılə şəxsi həm colinə, həmən de co kəson bə ico mılkiyə xıvandbey həxiş heste.
2. Hiç kəsi ıştənbəsə çı mılkiyəto məhrum karde əbını.

Maddə 18

Har qılə şəxsi fikir, vicdon iyən din ozodəti həxiş heste. Bı həxe ıştə dini iyən etiğati dəqış karde ozodəti, bəştə dini iyən bovə kardəyon təhsil, dıvo kay, dini iyən ritualə ayınən icro kay vaxti colinə, ya de cokəson bə ico, oşko ya fərdi şikilədə etiğad kay daxile.

Maddə 19

Har qılə şəxsi əğidə iyən əy sərbəst ifadə karde ozodətiş heste; bı həxe be maneə bə əğidə malikbə iyən informasiyon ya ideyaon devləti sərhədiku bə şıkrə nıbə de dilipiyə vasitəon nəve, ya bə dast varde, pevılo kay ozodəti daxile.

Maddə 20

1. Har qılə şəxsi bə dinc yığıncağon iyən assosiasiyon ozodəti həxış heste.
2. Hiç kəsi bə konsə qılə assosiasiya uzvəti məcbur karde əbini.

Maddə 21

1. Har qılə şəxsi devləti idarə kardeədə ya bilavasitə, ya ozodə şikilədə vıjnyəbiə numayəndon vasitə iştirak kay həxış heste.
2. Har qılə şəxsi iştə olkədə devləti idaronədə xıdmət kardeyo bə bərobər imkoni həxış heste.
3. Xəlği iradə çı iqtidarə hakimiyəti əsas bənine; In iradə iştəni de nunəkılə sədodoymonə roy, umumiyə iyən bərobərə vıjonyə həxe, ya sədodoymonə ozodəti təmin bikə de co eynimənəynə forməyon dəvonyə biə mıtəmadi iyən soxtə nıkardeyonə vıjnyon nişo doənine.

Maddə 22

Har qılə şəxsi çı cəmiyəti uzv təkı sosialə mıdafiəş bənine iyən de milliyə ya beynəlxəlğə həmkəoti roon, har devləti soxtəmoni iyən pesurson dairədə çəy ləyoğəti mıdafiə iyən şəxsiyəti ozodə ovciyo iqtisadiyə, sosialə iyən mədəniyə sahonədə həxonış heste.

Maddə 23

1. Har qılə şəxsi de zəhməti dastko bey, sərbəstə koy vırə seçim karde, ədolətinə iyən çokə ko şərəiti bey, iyən bekoətikü mıdafiə bey həxış heste.
2. Har qılə şəxsi hiç qılə co-vıjnyəti nıbiə bo i curə koy i curə zəhməthəx səy həxış heste.
3. Har kobikə şəxsi bəştə koy qorə lozim beədə de co sosialə mıdafiə vasitəon təmom biə, çəy iştəni iyən xeyzoni loyiğinə quzroni təminbikə ədalətinə iyən qənoətbəxşə maaş səy həxış heste.
4. Har qılə şəxsi həmkaron ittifoğ soxtə iyən iştə sosialə marağon mıdafiə kardeyo bə həmkaron ittifaği uzvbey həxış heste.

Maddə 24

Har qılə şəxsi istirohət, iyən asudə vaxt, həmçinin koyə ruji bəəğılınıştə hudud, iyən maaş doə biə mıtəmadiyə məzuniyəti həxış heste.

Maddə 25

1. Har qılə şəxsi iştəni iyən xeyzoni səhhəti iyən rifahi təmin kardeyo lozimbiə hardemon, takanemon, tibbiyə xıdmət, iyən lozimi sosialə təminatəon daxilbiə jiməonə səviyyə iyən bekorəti, noxəşəti, əliləti, vevə mandəti, pıbeyəti, iyən çı şəxsi iştənikü bə şıkrənıbə səbəbonku jiməonə vasitəon qın kardeədə bə təminatı həxış heste.

2. Moəti iyən hırdənəti bə məxsusiyə ğeydi iyən koməq səy həxış heste. Nikohi səkiştədə, ya nikohiku bəkəno movardəbiə hırdənən i curə sosialə mıdafiəku istifadə kardəninin.

Maddə 26

1. Har qılə şəxsi təhsil səy həxış heste. Kami ibtidai iyən umumiyyə təhsil bepul bənine. İbtidaiyyə təhsil icbari bənine. Har kəsi bo texnikiyə iyən pişə təhsili səyo imkanış bənine. Ali təhsilən de har kəsi ğabiliyyəti bə həmməy i curə dərəcədə miyəssər bənine.

2. Təhsil - bo insoni şəxsiyyəti tam inkişafıyo iyən bə insoni həxon iyən bə əsasınə ozodətion hurməti zyod kardeyo səbəro kardə bənine. Təhsil xəlğon irqi iyən diniyyə qrupon arədə, iyəndı dərəsemon, duruminəti iyən dustəti mehkəm kardeyo iyən İbiə Milləton sulhi oğəte sahədə fəaliyyət nişo doyo koməq kardənine.

3. Valideynon boştə hırdəsininə əğılon təhsili novi səçın kardeədə sərbəstin.

Maddə 27

1. Har qılə şəxsi cəmiyyəti mədəniyyə jimonədə iştirək karde, hınəsənətiku həzz səy, elmiyyə tərəğğiyədə iştirək karde iyən çəy foydəku istifadə karde həxış heste.

2. Har qılə şəxsi müəllif bə elmiyyə, ədəbiyyə iyən hınəsənətə əsəron səkiştədə bə məydon beşə maddiyyə iyən mənəviyyə mənafeyon noğo doyo həxış heste.

Maddə 28

Har qılə şəxsi bın Bəyonnomədə əks biə həx iyən ozodətion tam təminbiə sosialə iyən beynəlxəlğə reçini həxış heste.

Maddə 29

1. Har qılə şəxsi əncəx çəy ozod iyən tam inkişafış mımkunbiə cəmiyyəti vədə vəzifonış heste.

2. İştə həx iyən ozodətion bə əməl vardeədə har qılə şəxs əncəx bə jələvonə məhdudiyəton məruz mande bəzine ki, əvon çı ğanuni tərəfikü çı co kəson həx iyən ozodətion zıne iyən bəvon hurmət be təminatıku, iyən demokratikə cəmiyyəti əxlaqiyə, ictimaiyyə, asayışə iyən umumiyyə rifahə tələbon bə vırə rosne məğsədi təmin kardəyku bə nav bo.

3. In həx iyən ozodətion bə əməl varde bə İMT məğsəd iyən prinsipon zidd nibənine.

Maddə 30

In Bəyonnomədə hiççi bə konsə qılə devləti, bə şəxson qrupi, iyən bə co-co şəxson Bəyonnomədə elanbiə həx iyən ozodətion məhv kardeyo səbərobıə de har qılə fəaliyyəti dastko be, ya konsə qılə joğə hərəkəti bə əməl varde həx doyo təkinə təfsir karde əbini.

Tərcüməkə: Allahverdi BAYRAMI,

Redaktəkə: Ataxan ƏBİLOV

09.12.11